

# Novs commembers e constituziun

## Cussegl dal public SRG.R

■ (cp) **Il cussegl dal public ha mess l'accent da l'emprima sesida 2013 sin l'introducziun da las novas commembras e dals novs commembers e la constituziun per la perioda d'uffizi 2013–2016. Roger Tuor-Reuss da Mustér è vegnì elegì sco vicepresidente ed actuar. Il cussegl ha plinavant nominà la grupp da lavur per il premi schurnalistic SRG.R che vegn surdà per l'emprima giada la primavera 2014.** Il cussegl dal public ha tegnì sesida l'emprima giada cun las novas commembras e cun ils novs commembers dal gremi.

Pervia da la limitaziun dal temp d'uffizi han plirs commembers stuì sortir dal cussegl ed auters èn sortids per motivs persunals. Il cussegl è sa constituì da nov per la perioda d'uffizi 2013–2016. *Roger Tuor-Reuss* è vegnì elegì sco vicepresidente ed actuar. El remplazza *Chatrina Josty* ch'aveva demissionà per la fin 2012. A la sesida dals 13 da favrer ha il cussegl dal public cooptà *Carmen Dedual* da Parsonz sco nova commembra. Cun questa elecziun è il gremi puspè cumplet.

RTR Radiotelevision Svizra Rumantscha ha preschentà la planisaziun 2013 e la purschida da programs. In dals accents da quest onn è il giubileum da 50 onns Television Rumantscha (1963–2013).

Il cussegl dal public è il liom tranter las redacturas ed ils redactors ed il public. Gronda paisa han ins perquai dà a l'introducziun dals novs commem-

bers dal gremi. RTR ha plinavant orientà da la retschertga tar il public da la firma DemoSCOPE davart l'acceptanza dals programs.

Ina part da la retschertga ha tractà la cumpetenza linguistica dal public. La plipart dal public chapescha rumantsch grischun e la retschertga demussa che la midada dal program da Radio Rumantsch vegn giuditgada en general positiv. Il dumber d'audituras ed auditurs resta stabil.

Il nov president da la SRG.R, *Oscar Knapp*, ha participà a la sesida. *Flavia Hobi* da Vilters ha preschentà sia lavur da matura tar il tema «RTR e ses svilup en consideraziun speziala da las emissions per uffants e giuvenils». Il cussegl dal public observa il 2013 la purschida da program RTR per giuvenils. In'egliada speziala dat el sin ils svilupps en il sector dad online.

La proxima sesida è l'avrigl 2013. Lura tracta il cussegl dal public la moderaziun en il Radio Rumantsch.

Sin fundament d'in raster da criteris giuditgescha il cussegl las moderaturas ed ils moderators dal Radio Rumantsch.

Ina grupp da lavur cun tschintg commembras e commembers rimna nominaziuns per emissions e prestaziuns spezialas da radio, television e multimedia per il Premi schurnalistic SRG.R.

Il premi è dotà cun 6000 francs e vegn surdà l'emprima giada la primavera 2014.